

勝幢臂印陀羅尼經

唐三藏法師玄奘奉詔譯

如是我聞一時薄伽梵在雞羅山頂天仙神
 官與大苾芻眾千二百五十人俱及無量無
 數菩薩摩訶薩粵殊室利跋陀波羅十六大
 士而為上首并諸天人阿素洛等^{莫十}大梵天王
 而為上首無量大眾前後圍遶爾時世尊住
 正念智為諸大眾說微妙法時大梵王率諸
 天眾阿素洛等頂禮佛足合掌恭敬住如來
 前俱白佛言世尊在昔為欲利樂諸有情故
 求證無上正等菩提悲願熏心成等正覺有
 大神力具大慈悲何故現見諸有情類墮在
 地獄餓鬼傍生及人天中受諸劇苦不設善
 巧方便濟拔惟願哀愍令脫苦難時觀自在
 亦率無量持呪天仙頂禮佛足合掌恭敬住

如來前俱白佛言惟願哀愍諸有情故開示
 善巧拔苦難法爾時世尊告二大士及其眷
 屬汝等就座吾今愍念一切有情略說善巧
 拔苦難法汝應諦聽極善思惟有大陀羅尼
 名勝幢臂印若常誦念能滅五逆十惡等罪
 終不更受諸惡趣生及人天中所有劇苦恒
 受持者現得財位於當來世生尊貴家所欲
 現前受諸快樂常值諸佛得宿命念乃至無
 上正等菩提陀羅尼曰

羯洛羯洛 枳利枳利 矩路矩路 薩洛
 薩洛 徒利徒利 速路速路 薩縛佛陀
 婆盧枳諦 達洛達洛 薩縛達摩 路迦
 目契 折洛折洛 薩縛僧伽 地瑟恥諦
 跋洛跋洛 頰泥迦佛陀俱胝婆史諦 廁
 拏廁拏 薩縛羯摩 筏刺拏禰 莫摩薩

縛 薩埵難遮 薩婆波耶尼 薩縛獨佉
 波捺耶 勃栗吒勃栗吒 達栗吒達栗吒
 捺吒捺吒 羯吒羯吒 颯怖吒耶颯怖吒
 耶 薩婆筏刺拏 波耶突揭底尼 莎訶
 善男子此勝幢臂印陀羅尼是殞沙等諸佛
 共說吾今愍念一切有情因汝等請亦為眾
 說善男子諸佛出世甚為難遇善得人身復
 難於是聞此神呪更復為難若有善男子善
 女人能正受持尚為難得何況書寫精勤誦
 念及勸他人令受持者善男子我念過去曾
 於藥師瑠璃光勝觀等諸佛所聞此神呪受
 持讀誦正為他說由此證得無上菩提是故
 汝等應隨勤學勸諸有情受持讀誦令脫苦
 難獲勝利樂時薄伽梵說此經已粵殊室利
 菩薩跋陀波羅菩薩觀自在菩薩大梵天王

及諸天人阿素洛等一切大眾聞佛所說皆
 大歡喜信受奉行

勝幢臂印陀羅尼經